



W. Waimann

Leonhart Fuchs: Das Kräuterbuch von 1543

Weiden (126) ←  → Wunderbaum (128)

## Von Erdtrauch. Cap. CXXVII.



Erdtrauch ( CXCI )  
Abbildung: Seite 350

Deutsch: Erdrauch, gewöhnlicher  
English: Fumitory, common  
Francais: fumeterre  
Latein: Fumaria officinalis

### Namen.

**E**rdrauch nent man sonst auch Taubenkropff / und Katzenkörbel. Auff Griechisch würdt es Capnos / zu Latein Fumaria / inn Apotecken Fumus terrae geheysen. Ursach seins names ist das es vonn *feyßtem* feuchten dunst der äcker wechst / wiewol es auch vom same auffgeet wo er hin fellt. Ein andre ursach haben wir im Lateinischen kreüterbuch angezeygt.

### Gestalt.

Erdrauch hat vil steümlin oder ästlin. Seine stengel seind vierecket / mit zinnelechten kleinen zarten weychen blettern bekleydet wie der Coriander / doch äschenfarber. Gewindt braun blümlin / welche in der ersten sich einem treümlin vergleichen / darnach aber wann sie sich auffthun / steet ein yedes auffwertz an dem stengel hart an dem andern. Dise so sie verblüen werde knöpfflin darauß / in welchen ist ein kleins sämlin. Die wurtzel ist eintzig / spitzig / mit wenig unn kleinen *zaseln* oder haren.

### Statt seiner wachsung.

Erdrauch wechst gern in gersten feldern / gärten / zeünen / weingärten / *flachß* und andern feyßten gebawten orten.

### Zeit.

Blüet erstlich im Meyen und *Brachmonat* / darnach gegen dem Herbst.

### Die natur und complexion.

Erdrauch ist warmer und truckner natur im andern grad / wie man das leichtlich auß seinem geschmack / der do scharpff ist und bitter / kan abnemen.

### Krafft und würckung.

Taubenkropff safft ist ettwas scharpff / derhalben scherpffet er das gesicht / unnd macht klare augen. Treibt die *träher* unnd macht weynen gleich als der *rauch*. Mit gummi vermischet und angestrichen / verhütet er das an den augbrawen nit zwyfache hörnlin wachsen. Das kraut in wasser *gesotten* und getruncken / treibt die gallen durch den harn auß / unn heylet die verstopffung der leber / und derselbigen schwachheyt. Das kraut gedörret und gepulvert mit *Meth* getruncken treibt durch den stulgang. Mit geringem wein aber jngenommen / stercket es den magen. Ist auch nützlich und gut denen so mit der *rauden* und anderen bösen grinden beladen seind.

Weiden (126) ←  → Wunderbaum (128)

